

Ang Kaminyoon ug Pamilya Gi-orden sa Dios

Kaminyoon tali sa lalaki ug sa babaye

Pagtuon:

Basaha ang Marcos 10:6–9; 1 Mga Taga-Corinto 11:11; ug ang mosunod nga pamahayag ni Sister Bonnie L. Oscarson, kanhiay nga Kinatibuk-ang Presidente sa Young Women. Pangitaa ang mga pagtulun-an mahitungod sa kaminyoon tali sa lalaki ug sa babaye.



Gitudloan kita diha sa mga kasulatan, “Hinoon, diha sa Ginoo ang babaye dili gawas sa lalaki, ni ang lalaki gawas sa babaye” [1 Mga Taga-Corinto 11:11]. Alang ni bisan kinsa nga makakab-ot sa kahingpitan sa mga panalangin sa priesthood, kinahanglan gayod nga may bana ug asawa nga na-sealed diha sa balay sa Ginoo, nag-ambahan sa katarong, ug nagpabiling matitud-anon sa ilang mga pakigsaad. Kini mao ang plano sa Ginoo alang sa lyang mga anak, ug walay igong pakigpulong o pagpanaway sa publiko nga mousab sa unsay napadayag sa Ginoo. . . . Magmahimo kitang tigpanalipod sa kaminyoon ingon nga gi-orden

kini sa Ginoo samtang magpadayon sa pagpakita og gugma ug kaluoy alang niadtong may lahi nga mga ideya. (Bonnie L. Oscarson, “Mga Tigpanalipod sa Pamahayag bahin sa Pamilya,” *Liahona*, Mayo 2015, 15)

Paghisgot:

- Sa unsang paagi nga ang kaminyoon tali sa babaye ug sa lalaki makatabang sa pagtuman sa “plano sa Tiglalang alang sa walay kataposan nga destinasyon sa Iyang mga anak”? (“Ang Pamilya: Usa ka Pamahayag ngadto sa Kalibotan,” ChurchofJesusChrist.org).
- Unsaon nato sa pagpakita og kaluoy niadtong adunay lain-laing mga panglantaw samtang nanalipod gihapon sa doktrina sa Manluluwas mahitungod sa kaminyoon tali sa lalaki ug sa babaye?

“Sumanay ug pun-on ang yuta”

Pagtuon:

Basaha ang Genesis 1:27–28; Salmo 127:3; Marcos 10:13–14; ug ang mosunod nga pamahayag ni Elder Neil L. Andersen sa Korum sa Napulog Duha ka Apostoles. Pangitaa ang mga pagtulon-an sa Ginoo mahitungod sa mga bata.



Samtang kita motan-aw sa mga mata sa usa ka bata, atong makita ang isigkaanak sa Dios nga lalaki o babaye kinsa atong kauban sa kinabuhi sa wala pa dinhi sa yuta.

Usa kini ka talagsaong pribilehiyo sa bana ug asawa kinsa makapanganak aron makahatag og mortal nga lawas alang niining espiritung mga anak sa Dios. Nagatuo kita sa mga pamilya, ug nagatuo kita sa mga anak.

Kon ang usa ka bata matawo sa usa ka bana ug asawa, nagtuman sila og bahin sa plano sa atong Langitnong Amahan sa pagdala og mga anak dinhi sa yuta. Ang Ginoo miingon, “Mao kini ang akong buhat ug ang akong himaya—ang pagpahinabo sa pagkaimortal ug sa kinabuhi nga dayon sa tawo” [Moises 1:39]. Sa dili pa ang imortalidad, kinahanglan nga dunay mortalidad. (Neil L. Andersen, “Mga Bata,” *Liahona*, Nob. 2011, 28)

Paghisgot:

- Sa unsang paagi nga ang pagtan-aw sa mga anak ug pamilya nga adunay mahangtorong panglantaw makatabang sa magtiayon sa paghatag og prayoridad sa pipila sa ilang mga desisyon?
- Unsa ang atong nakat-onan gikan sa ehemplo sa Manluluwas mahitungod kon unsaon nato pagtratar ug pagpakig-uban ang mga bata?

ANG SIMBAHAN NI
JESUKRISTO
SA MGA SANTOS
SA ULAHING MGA ADLAW